



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

IGREYIDI 12

ISINDEBELE ILIMI LEKHAYA (HL)

IPHEPHA LESIBILI (P2)

NOVEMBA 2014

IMITLOMELO: 80

ISIKHATHI: ama-iri ama-2½

Iphepheli linamakhasi ama-22.

YELELA

1. Umfundi kufanele afunde ikhaseli ngokukhulu ukuyelela ngaphambi kobana aphendule imibuzo.
2. Ungalingi ukufunda iphepha lemibuzo loke. Qala ikhasi lokumumethweko elisekhasini elilandelako bese utshwaya iinomboro zemibuzo ebuzweko ngeencwadi ozifundileko kilomnyaka. Ngemuva kwalapho, funda imibuzo le bese ukhetha leyo ofisa ukuyiphendula.
3. Iphepheli LINEENGABA EZINTATHU:

ISIGABA A:	linkondlo	(30)
ISIGABA B:	Inovela	(25)
ISIGABA C:	Umdlalo	(25)
4. Phendula IMIBUZO EMIHLANU seyiyoke:

EMITHATHU KUSIGABA A
MUNYE KUSIGABA B
NAMUNYE KUSIGABA C

NGALINDLELA:

ISIGABA A: IINKONDLO
IINKONDLO EZIBONIWEKO – phendula imibuzo EMIBILI.
IKONDLO ENGAKABONWA – mbuzo okatelelekileko.

ISIGABA B: INOVELA
Phendula umbuzo MUNYE.

ISIGABA C: UMDLALO
Phendula umbuzo MUNYE.
5. KHETHA IIMPENDULO ZESIGABA B (INOVELA) NEZESIGABA C (UMDLALO)
 - Phendula ngenovela nofana umdlalo owufundileko KWAPHELA.
 - Phendula umbuzo munye omude namunye omfitjhani.
Nangabe uphendule umbuzo omude ESIGABENI B, ufanele uphendule umbuzo omfitjhani ESIGABENI C.
Nangabe uphendule umbuzo omude ESIGABENI C, ufanele uphendule umbuzo omfitjhani ESIGABENI B.
Sebenzisa irherho lokuzihlola lizakusiza.

6. UBUDE BEEMPENDULO

- Imibuzo emide yekondlo ifanele iphendulwe ngamagama ali-190 kufika kwama-240.
- Imibuzo emide yesigaba senovela nesomdlalo kufanele iphendulwe ngamagama ama-340 kufika kwama-390.
- Iimpendulo zemibuzo emifitjhani kufanele zilawulwe mitlomelo enikelweko. Umfundi kufanele atjheje umtlomelo wombuzo ngaphambi kobana angaphendula ukuze abe mfitjhani abe akhambelane nokubuzweko.

7. Landela imiyalo esekuthomeni kesinye nesinye isigaba ngokuyelela.

8. Tlola iinomboro zeempendulo zakho zifane patsi nangendlela ezinonjorwe ngayo ephepheni lemibuzo.

9. Thoma isigaba ESINYE NESINYE ekhasini ELITJHA.

10. Tlola ngesandla esihle nesibonakalako.

11. Isikhathi esiphakanyisweko sokutlola isigaba NGASINYE:

ISIGABA A: pheze imizuzu ema-40

ISIGABA B: pheze imizuzu ema-55

ISIGABA C: pheze imizuzu ema-55

IKHASI LOKUMUMETHWEKO

Ikhaseli lizokwenza ukobana abafundi bakhethe imibuzo abafuna ukuphendula ngayo ngaphandle kobana bafunde iphepha loke.

ISIGABA A: IINKONDLO			
linkondlo eziboniweko:			
Phendula NOFANA ngimiphi imibuzo EMIBILI.			
INOMBORO YOMBUSO	UMBUSO	IMITLOMELO	IKHASI
1. Isizi	Umbuzo omude	10	6
NOFANA			
2. Amala	Umbuzo onemibuzo emifitjhani	10	7
NOFANA			
3. Kuwe Ndebele Kholitjhi	Umbuzo onemibuzo emifitjhani	10	8
NOFANA			
4. Awa, angivumi	Umbuzo onemibuzo emifitjhani	10	9
KANYE			
Nekondlo engakabonwa:			
Phendula umbuzo OWODWA.			
5. Tjwala	Umbuzo omfitjhani	10	11
ISIGABA B: INOVELA			
YELELA: ESIGABENI B no-C, phendula umbuzo OWODWA omude kanye NOWODWA umbuzo omfitjhani.			
Phendula umbuzo OWODWA.*			
6. <i>Mbala Ngubaba</i>	Umbuzo omude	25	13
NOFANA			
7. <i>Mbala Ngubaba</i>	Umbuzo onemibuzo emifitjhani	25	13
NOFANA			
8. <i>UKholiwe</i>	Umbuzo omude	25	15
NOFANA			
9. <i>UKholiwe</i>	Umbuzo onemibuzo emifitjhani	25	15
ISIGABA C: UMDLALO			
YELELA: ESIGABENI B no-C, phendula umbuzo OWODWA omude kanye NOWODWA umbuzo omfitjhani.			
Phendula umbuzo OWODWA. *			
10. <i>Ibhudango Lami</i>	Umbuzo omude	25	17
NOFANA			
11. <i>Ibhudango Lami</i>	Umbuzo onemibuzo emifitjhani	25	17
NOFANA			
12. <i>Umbango KaNzunza NoManala</i>	Umbuzo omude	25	20
NOFANA			
13. <i>Umbango KaNzunza NoManala</i>	Umbuzo onemibuzo emifitjhani	25	20

***YELELA:** ESIGABENI B kanye no-C, phendula umbuzo OWODWA omude kanye NOWODWA omfitjhani.

IRHELO LOKUQINISEKISA

- Tlola itshwayo (✓) erhelweni lokuqinisekisa elilandelako ukuhlola bona uphendule yoke imibuzo elindelekileko.

ISIGABA	IINOMBORO ZEMIBUZO	INANI LEMIBUZO EZOKUPHENDULWA	IMIBUZO	TLOLA ITSHWAYO EMBUZWENI OWUKHETHILEKO
A: Iinkondlo (eziboniweko)	1–4	2	1	
			2	
			3	
			4	
A: Iinkondlo engakabonwa	5	1	5	
B: Inovela (Umbuzo omude ANYANA umbuzo onemibuzo emifitjhani)	6–9	1	6	
			7	
			8	
			9	
C: Umdlalo (Umbuzo omude ANYANA umbuzo onemibuzo emifitjhani)	10–13	1	10	
			11	
			12	
			13	
YELELA: ESIGABENI B no -C, phendula umbuzo OWODWA omude kanye NOWODWA umbuzo omifitjhani.				

ISIGABA A: IINKONDLO**IINKONDLO EZIBONIWEKO**

Phendula imibuzo **EMIBILI** kwaphela.

UMBUZO 1: UMBUZO OMUDE

Funda ikondlo elandelako bese uphendula umbuzo.

Isizi – JN Malobola

- 1 Laphuma njengemihla,
- 2 Laphakama lihlophe
- 3 Ukuzifihla kunina.
- 4 Imisebenzi yemihla
- 5 Irheme ngerherho layo.

- 6 Umuntu woke bekahlophe
- 7 Ukuyokufika lapho
- 8 Lapho alima khona.
- 9 Amacoco akakho kangako
- 10 Mvulo sidiniwe,
- 11 Nokho siyakhona,
- 12 Igijima njengemhleni ibhesi.

- 13 Maye! Ha ... wu ...! Iwu!
- 14 Gidi! Bhu! Bhu!
- 15 Ngokuphazima kwelihlo
- 16 Kwaphela nya!
- 17 Kwathula du!
- 18 Ababonileko kwaba ngabathulileko,
- 19 Abalimeleko kwaba ngabaphephileko
- 20 Isizi le-Wagendrift lembatha
- 21 IKwaNdebele ngomzuzwana.

- 22 Abotitjhere bayile,
- 23 Bakhambile abafundi,
- 24 linsebenzi zombuso ziyile,
- 25 UMBuso wembethe isizi.
- 26 Kwalila umNyango wezeFundo,
- 27 Khona umnyaka sele wonde kangaka?
- 28 Awa, ukwelusa kubhalile,
- 29 linkomo zifahlile, kubhalile.

Tsenga ummoya ozwakaliswa yimbongi ekondlweni engehla. Dzubhula bewuhlathulule amagama ewakhethileko ukuzwakalisa lowo mmoya. Amagamakho ozowasebenzisa akabe li-190 kufika kwama-240.

[10]**NOFANA**

UMBUZO 2: UMBUZO ONEMIBUZO EMIFITJHANI

Funda ikondlo elandelako bese uphendula imibuzo.

Amala – JK Mahlangu

- 1 Mala ndina wavelaphi?
 2 Sewamil' elimini lami,
 3 Neenhloni sezafa kimi
 4 Ungitjhugululile mala
 5 Ungitjhugulule inyeberu
 6 Ngingasiyo nakancani,
 7 Umvuzwami kwaba yintwa.
- 8 Mala waba yini?
 9 Abaphila ngawe abanatlha.
 10 Abahloya wena bayaphumelela.
 11 Abahloya wena bayathembeka
 12 Abany' abakuthandi Thandi,
 13 Babodwa abakukhonzako.
- 14 Mala wabuyaphi?
 15 Imizi uyiphulile.
 16 Usivunguvungwani mala.
 17 linthandani zitlhalene ngawe,
 18 Izelelesi zibotjhiwe ngawe,
 19 Ineng' ulibulalisile,
 20 Ngawe liyile lifile.
- 21 Mala ndina!
 22 Ngilisa mala ngilisa!
 23 Ngilisa ngiziphilele ngeqiniso,
 24 Ngilisa ngivume zam' izono,
 25 Khon' uZim' azangilibalela.
- 26 Mala ndina unomona!
 27 Malakaz' ungonele.
 28 Ngebizo lakaZimu ngiyakuyala.
 29 Ngiyakuyala ngiyakulaya mala
 30 Ngithi phum' elimini lami.
 31 Nelincan' ilungel' awunalo
 32 Phuma mala phuma!

2.1 Dzubhula igama imbongi elibuyelele kanengi ekondlweni le, elikhombisa bona imbongi inyefula isenzeko esimbi esenziwa mamala. (1)

2.2 Tlola imihlobo EMIBILI yevumelwano emunyethwe mimida engenzasi.

'Ngilisa ngiziphilele ngeqiniso,
 Ngilisa ngivume zam' izono,' (2)

- 2.3 Buyelela utlole umuda ongenzasi ujamiselele igama elithalelweko ngelinomqondo ofana nalo.
'Umvuzwami kwaba yintwa.' (1)
- 2.4 Ucabanga bona kubayini imbongi ingathekise amala nesivunguvungwani ekondlweni le? (2)
- 2.5 Uyini umnqopho wembongi ngokusebenzisa ibuyelela-mqondo emideni we-10 nowe-11 ekondlweni engehla? (2)
- 2.6 Tshwaya ngelihlo elibukhali umuda ongenzasi uveze ihloso yembongi ngokusebenzisa amagama athalelweko.
'Ngiyakuyala ngiyakulaya mala.' (2)
[10]

NOFANA**UMBUZO 3: UMBUZO ONEMIBUZO EMIFITJHANI**

Funda ikondlo elandelako bese uphendula imibuzo.

Kuwe Ndebele Kholitjhi – JM Mthimunye

- 1 Ngithi uyababona na?
- 2 Beza bagijima ngebelo
- 3 Beza kuwe sithakgha,
- 4 Sithakgha esingadinwako,
- 5 Sithakgha esingaphel' ihliziyo.
- 6 Mbandulo yakoMbokodo.
- 7 Sithi napo abantabethu,
- 8 Sibanikela kuwe ngokwazi,
- 9 Ukwazi itsengo lakho.
- 10 Ngithi uyababona na?
- 11 Yewubakhongozele ngezakh' izandla,
- 12 Ezinuk' ifundiso yokuhlakanipha.
- 13 KwaNzunza naKwaManala
- 14 Bekuzakuphilwa bunjani nabe ungekho?

- 3.1 Bobani laba imbongi ethi bagijimela esithakgheni esiyiNdebele Kholitjhi? (1)
- 3.2 Tlola umhlobo wesithombe-ngqondo esimunyethwe mumuda we-11 ekondlweni engehla. (1)
- 3.3 Tlola igama elisetjenziswe ekondlweni engehla elihlathulula bona iNdebele Kholitjhi yindawo la kubandulwa khona abantu ukobana babe botitjhere. (1)
- 3.4 Tlola umhlobo wevumelwano osetjenziswe yimbongi emideni yesi-7 ukufika kewe-8. (1)

- 3.5 Ngokuzwisisa kwakho ikondlo le ungathi imbongi izama ukusitjelani ngomuda wobu-8 ukuya kowe-9 wekondlo engehla le. (2)
- 3.6 Hlathulula umnqopho wembongi wokungathekisa iNdebele Kholitjhi nesithakgha ekondlweni le. (2)
- 3.7 Tshwaya indlela imbongi esebenzise ngayo ilimi emideni we-13 kuya kewe-14 wekondlo le bese uhlathulula ekutjhoko uqalise elwazini lakho. (2)
- [10]**

NOFANA

UMBUZO 4: UMBUZO ONEMIBUZO EMIFITJHANI

Funda ikondlo elandelako bese uphendula imibuzo.

Awa, angivumi – MS Mahlangu

- 1 Ikoroyami neyakho
- 2 Njengomuntu nesibandana, azifani.
- 3 Isibongo sami nesakho
- 4 Njengeentaba, zihlangana ngamathunzi.
- 5 Izinyo lakho nelami
- 6 Njengezulu nephasi atjhidelene.
- 7 Kodwana mina nawe siyinyanda,
- 8 Ebotjhwesithakgha samambala,
- 9 Sona esathabisa amazuba nasiyibophako.
- 10 Sona esadanisa iimfene nasiyibophako.

- 11 Ekutatayeni sabe sisoke,
- 12 Ekuqothaqotheni iinkukhu sabe sisoke,
- 13 Itshele yabe imudlalo omnandi,
- 14 Kodwana amagqubu bekanganandawo
- 15 Ngombana banjalo abonombuso ezulwini

- 16 Ikhambo lefundo salisungula soke,
- 17 Ukungafuni ukudlulwa kwaba yikuthazano,
- 18 Eyamila kimi, nakuwe,
- 19 Eyadala bonyana sitjheletjhelele
- 20 Njengeemfesi zeTjhaluza.

- 21 Ukuthanda ukuphalisana kwami nawe,
- 22 Ngikho okusifikise lapha,
- 23 Ngikho okusitjengisa idoloesele lisenyonga.
- 24 Emidlalweni yeenkolo
- 25 Sabe sibomabizwasabele,
- 26 Sabe siziingorho zayo yoke.
- 27 Bewungasihlula, bewungazikhotha emhlana,
- 28 Besingazikhanzinga besikudlule inga ujamile ...

29	Manje ngiyala mngani
30	Le ofuna siphalisane ngayo akusiyo
31	Akusiyo ngiyala.
32	Sesiye kabili kwaphela ebandleni
33	Kodwana ufuna siphalisane ngobunganwa,
34	Singanwe bekunghonghoyile abanye,
35	Singanwe besilibal' iincwadi,
36	Singanwe besizitjhadise namaliba,
37	Singanwe besizonele ikusasa,
38	Awa, angivumi ukuphalisana ngobunganwa.

- 4.1 Tlola ubukondlo OBUBILI obusetjenziswe yimbongi emudeni wama-27 ekondlweni engehla. (2)
- 4.2 Ngokurhunyezweko akhe utlole ubungozi imbongi ethi bangazifaka kibo nange bangaragela phambili ngokuphalisana ngobunganwa? Tlola bube BUBILI. (2)
- 4.3 Dzubhula umuda ngamunye osetjenziswe ekondlweni le osivezela iihlathululo ezilandelako:
- 4.3.1 Imbongi nomnganayo bebangabambelani amavunda ekukhuleni kwabo. (1)
- 4.3.2 Imbongi nomnganayo sele baseduze nepumelelo. (1)
- 4.4 Kubayini imbongi ifanise ukuthabela kokuqina kobungani babo namazuba emudeni we-9 wekondlo le? Ihlathululo ayibe mumuda OWODWA. (2)
- 4.5 Ekondlweni le imbongi izwakala ingakhambisani nesenzo sokuphalisana ngobunganwa nomnganayo begodu lokho kubonakala kungaqeda isikhozi sabo. Nange uyimbongi ngikuphi ongakwenza bona isikhozi sakho nomnganakho lo singapheli kanti godu kungabi nokuphalisana ngobunganwa? (2)

[10]**KANYE**

NEKONDLO ENGAKABONWA

Ukatelelekile ukuphendula umbuzo lo.

UMBUZO 5

Funda ikondlo elandelako bese uphendula imibuzo.

Tjwala – BD Masango

- | | |
|----|------------------------------------|
| 1 | Walidung' iphasi lekhethu, |
| 2 | Umloy' ungcon' akakhulumi, |
| 3 | Ukhamb' ebusuku silele, |
| 4 | Wen' ubonakal' emini, |
| 5 | Tjwala ndina! |
| 6 | Amahlon' ayekhenomkhulu |
| 7 | Utshwenya ngomban' ungena, |
| 8 | Emadodeni, ebafazini nebantwaneni, |
| 9 | Ungena kancan' ugugubale, |
| 10 | Tjwala ndina! |
| 11 | Umlomakho liluju leenyosi, |
| 12 | Amehlwakh' azel' ithando |
| 13 | linyawo zakho zilula, |
| 14 | lindlebe zakho ngezekhondlo, |
| 15 | Tjwala ndina! |
| 16 | Ubiz' isitjhaba ngesikhatjhana, |
| 17 | Ubenz' abangani bakho, |
| 18 | Kant' ufun' isikhwama, |
| 19 | Ubatjhiye bakhamisile, |
| 20 | Tjwala ndina! |
| 21 | Ubabamba ngeluju lakho, |
| 22 | Ubajikele ngemathunjini, |
| 23 | Kubhuruk' imizi yamadoda, |
| 24 | Kubangw' imal' edliwe nguwe, |
| 25 | Tjwala ndina! |
| 26 | Maye! Walidung' iphasi lekhethu, |
| 27 | Bangak' abafele kuwe, |
| 28 | Bangak' ababethwa ngebanga lakho, |
| 29 | Sukapha! Mloyikazi. |
| 30 | Tjwala ndina! |

5.1 Ngokurhunyezweko akhe utlole izinto ezimbi EZIMBILI imbongi ethi zenziwa butjwala. (2)

5.2 Tlola iinthombe-ngqondo EZIMBILI ezimunyethwe mumuda we-11 ekondlweni engehla. (2)

- 5.3 Hlathulula ngamagamakho okunqotjhwe yimbongi ngemida elandelako yekondlo engehla le.
- 5.3.1 'linyawo zakho zilula,' (2)
- 5.3.2 'lindlebe zakho ngezekhondlo,' (2)
- 5.4 Njengombana sewuzwile ngobumbi botjwala ekondlweni le akhe ucoce uveze isiphakamiso esingenziwa ngomnqopho wokukhandela bona utjwala nanyana buselwa kodwana bulawuleke. Ipendulwakho ayibe mumutjho OWODWA. (2)

[10]**IMITLOMELo YESIGABA A: 30**

ISIGABA B: INOVELA

YELELA: ESIGABENI B kanye no-C, phendula umbuzo OWODWA omude kanye NOWODWA umbuzo omfitjhani.

Kilesisigaba kuneencwadi zamanovela EZIMBILI, UMBALA NGUBABA NOKHOLIWE.

Khetha inovela EYODWA uphendule ngayo umbuzo OWODWA.

UMBUZO 6: UMBUZO OMUDE**MBALA NGUBABA – PB Skhosana**

Inovela etloleke kuhle ngileyo umtlozi wayo ophumelele ukulamanisa izehlakalo zayo ngokwesikhathi. Akhe utsenge ngelihlo elibukhali inovela yesihloko esithi, *Mbala Ngubaba* bese uyahlathulula bona umtlozi wayo uphumelele kangangani ukulamanisa izehlakalo ezakha ummongo-ndaba wayo. Indabakho ayibe magama ama-340–390.

[25]**NOFANA****UMBUZO 7: UMBUZO ONEMIBUZO EMIFITJHANI****MBALA NGUBABA – PB Skhosana**

Funda isiqetjhana esilandelako bese uphendula imibuzo.

Ilanga nantiya phezulu. Kade avukile alindile uMavela. Ungena uyaphuma ngendlini. Amehlo athome kusese mnyama ukurhuluphela indlela engena ngemizini yeMkobola. Libe laphuma labe lenyuka do, ukuvela uSkhosana. Bazwene kuhle bona namhlanje, kufuze bavukele KwaMarhinini efandisini. Sewuze uyazindla uMavela bona mhlambe kunento evelele uSkhosana. NgoMgqibelo wakhamba atjihiye igama bona azombona. NgoSondo akhange avele. Nayizolo akhange avele. Nakhu nanamhlanje akaveli. Kuyatjho bona kukhona okukhona.

Asajame erhodlweni ayibone iqoqomela kaSkhosana iza ngendlela. Angasabuza uMavela, azijikijele ngendlini aphume nesikhwama sakhe. Udle ngentanjana esamtiyana ugala. Wembethe isudu emthuthu, wafaka irhembe elihlaza satjani, wabopha nethayi enzima. Enyaweni ufake amanyathelo abovu asele angasananthende. Ulele awathusathuse ngephoritjhi nokho ukobana aqaleke. Mbala ungomunye uMavela namhlanje. Athi angaphuma njalo ngendlini nesikhwama, aje ayihlangabeza. Ize ilori ithunyisa esabekako intuthu ngemva. Ibophile. linkomo ziyagadanganana. Ize beyizokufika kuMavela. Angasagada bona ijame, azijikijele ngaphakathi. 'Wakhwela ilori ikhamba nje, ufuna ukusitjhiya amabele amnandi kangaka Mavela?' kutjho uMasango ahlalele ngemnyango akhwela ngakiwo. USkhosana usabambe wangaphasi. 'Ngibona okungcono ngibulawe ngini ngombana ngiyabona bona seningibulele, niqedile. Ukufa okudlula lokhu akusekho' kutjho uMavela. Uthulile uSkhosana ngombana uyazi bona kufuze alwe uMavela. 'Ungisebenza njani kanti Jali?' Ilori seyjikijele ibuyela endleleni ekulu eya KwaMarhinini. 'Yeyi ungasabuza Mavela. Mitlhago yezinto zephasi yoke le engigijimisa kangaka. Ngizwile bona uthe ngifike msinya ngizokubona, kodwana ngabanjwa bulwele, ngasawulwa ngenye ihloko epheze yangithatha. Ngikhuluma nje ngisayizwa isawulela phasi. Nokho ungatshwenyeki ndodekhethu, thokoza nangifikileko wena,' kuleya uSkhosana amanga.

[Ikhasi 108–109]

- 7.1 Tlola into EYODWA elitshwayo lokobana isizinda sesikhathi senovela le kusehlobo. (2)
- 7.2 Tlola isizathu esabe senza bona uBongwe ahlale azibambe mathupha efuyweni nemasiminakhe nanyana abentwabakhe sele bakhulile bonyana bangamsiza. (2)
- 7.3 Tlola iphuzu LINYE elivezwe ngaphasi kwesizinda sobujamo bepilo kanye namasiko elisihlathululela bonyana kwamambala uNaKabini sele alilunga lomndeni wakwaBongwe ngokomthetho. (2)
- 7.4 Ngokurhunyezweko akhe utlole bewuhlathulule indlela uMavela afika ngayo esilarheni sakaSkhosana ngemva kobana bamtjhiye eMkobola. Ipendulo ayibe maphuzu AMABILI. (2)
- 7.5 Ngokurhunyezweko akhe uhlathulule ubudlelwano obabuphakathi kwakaMavela noyise lokha nakasaphilako. (2)
- 7.6 Ucabanga bona bewuyini umnqopho kaBongwe wokubeka isifiso asenzileko ezandleni zabameli angatjeli ngitjho namunye welunga lomndenakhe? (2)
- 7.7 Ucabanga bona isenzo somtloli sokobana asivezele umlingisi onguBongwe enze isifiso esithi ilifa lakhe lidliwe ngefundo, sisilethela muphi umlayezo. Ipendulwakho ayiqaliswe ngehlangothini labentwana abatjhiywe namafa? (2)
- 7.8 Khetha ipendulo enembako kezingenzasi.
Ngemva kobana uSkhosana banoMasango balayitjhe iinkomo zakaBongwe, uMavela bamtjhiya kwa Mzawakhe ...
- A uSoLiseni.
B kaSkhosana uSoLiseni.
C kaMasango uSoLiseni.
D kaMasango uLiseni. (2)
- 7.9 Phendula ngo**Liqiniso** namkha **Akusilo iqiniso** bese usekela isiqunto osithathako ngephuzu ELILODWA.
Eenkomeni ezetjiwa nguMavela banaboSkhosana nokho kukhonyana imadlana uSkhosana akhe amphuraphura ngayo lokha nakathengise ezinye zeenkomo zakaBongwe. (2)
- 7.10 Thatha isiqunto ngokukhetha indlela yinye phakathi keyesintu neyesikhuwa yokwabiwa kwelifa lomuntu osele ahlengakele bewuhlathulule bonyana kubayini ungakhetha indlela leyo nange ufuna ukwaba lakho ilifa. Ipendulo ayibe liphuzu ELILODWA. (2)
- 7.11 Nasiyelela umlingisi oyikutani wenovela le ingabe umtloli uphumelele kangangani ukusebenzisa isimilo amnikele sona ukusethulela umlayezo awuhlosileko? Sekela ipendulwakho. (2)

- 7.12 Coca ngendlela umtlozi asebenzise ngayo ilimi emagameni akhulunywa nguMavela athi, 'Mbala ngubaba woke lo, ongibulele ngiphila'. (2)
- 7.13 Ingabe isenzo saboDladla sokugcina isifiso kibo bangacabangi ukusikhwabanisa nanyana umninilifa angasekho siyakholweka nofana asikholweki? Hlathulula ngelwazi lakho. (1)
[25]

NOFANA**UMBUZO 8: UMBUZO OMUDE****UKHOLIWE – N Skosana**

Inovela etloleke kuhle ngileyo umtlozi wayo ophumelele ukulamanisa izehlakalo zayo ngokwesikhathi. Akhe utsenge ngelihlo elibukhali inovela yesihloko esithi, *UKholiwe* bese uyahlathulula bona umtlozi uphumelele kangangani ukulamanisa izehlakalo ezakha ummongo-ndaba wayo. Indabakho ayibe magama ama-340–390. [25]

NOFANA**UMBUZO 9: UMBUZO ONEMIBUZO EMIFITJHANI****UKHOLIWE – N Skosana**

Funda isiqetjhana esilandelako bese uphendula imibuzo.

'Siyathokoza ukukwazi makoti, nawe ufundisa Zomlando kanti?' 'Iye baba,' kutjho uKholiwe ngeenhlonyana, phela akakholwa ngento ayibona yenzeka le. 'Kholi, asikhambe,' kutjho uMuzi azele iinhleko. 'Muzi mntwanami uyadimana, uKholiwe akasatholi nento eselwako, khupha isiselo ngefrijini, uzakukhamba asela uKholi.' Enze njalo uMuzi. Baphume bakhamba. Adumise ikoloyi kudekude la baya khona, ekhabo kaKholiwe.

'Kodwana Muzi kuba yini ungenza nje?' Uzele ukumangala uKholi.

'Ngani kholi?'

'Wenza ngathi akusisekhenu lapha ko ...' Abhalelwe kuqedelela phela sewuyamhleka uMuzi. 'Kodwana Kholi bengimele ngithi, uyabona efuledzini leliya kusekhetu? Awa Kholi.'

Azibone ubudlhayela naye uKholi athi 'Uyazi lokha ngendlini ngithi ngisazokuthi asikhambe, ngibona uyazigedla. Nokho uthe bona ungazise kumma nakubaba, ngabona isithombe sakho ebodeni, ngabona kobana nangambala kukwenu lapha. Alo Muzi, kuba yini ubabakho angibize ngomakoti?'

'Ubaba uyabona Kholi bona akakho omunye ofanelwe kukuba ngumakotakhe ngaphandle kwakho. Kholi awufuni wena ukuba ngumakoti kababa nomma?' Atjho amqala ngamehlo azele ukuzimisela. Akhange aphenndule nokho uKholi. Ube ungathini? Ungasuka wena ubuze ibhesi etlolwe bona iya eTweefontein kobana iyaphi? Phela bazakubuza abantu bona awuboni bonyana itlolweni.

Bekunjalo-ke nakuKholiwe. Yakhamba ikoloyi beyafika ngeVlaklaagte No 2. Bafika kwaMabhena wayijamisa.

[Ikhasi 5]

- 9.1 Bebabuyaphi uMuzi banoKholiwe nabazokudlula ekhabo lakaMuzi nje? (1)
- 9.2 Ngubani ibizo lomngani kaKholiwe alala kuye nakasuka kuZwelibanzi. (1)
- 9.3 Gade athini amezwi akhulunywa ngusosokana kaKholiwe mhlazana bathutha kwaMhlanga basiya emzinabo? (2)
- 9.4 Ngikuphi okwenza umkaSipho abhale ukuphekelela uSipho kwaKholiwe lokha nakayokubonana noMuzi? (2)
- 9.5 Tlola izinto EZIMBILI uMuzi banomkakhe egade bafana ngazo. (2)
- 9.6 Ngokurhunyezweko tlola bona uMuzi uvezwe amlingisi onjani. Ipendulwakho ayibe mumutjho OWODWA. (2)
- 9.7 Ucabanga bona waba yini unobangela wokutshwenyeka komkaMfundisi lokha nasele kubonakala bona angeze basakghona ukufika eMamelodi ngebanga lekoloyi ephelwe yipetroli? (2)
- 9.8 Ingabe ikulumo kayise kaMuzi ethi, 'Siyathokoza ukukwazi makoti' imumethe muphi umqondo? (2)
- 9.9 Ingabe amagama athi, 'FUNDISA UMNTWANA NGENDLELA EZAKUTHI NALOKHA SELE AKHULILE AKHAMBE KIYO' aba namuphi umphumela epilweni kaKholiwe? (2)
- 9.10 Hlathulula unobangela wobudlelwano obabuphakathi komkaMfundisi noPetha obenza bagcine batholakale babobabili ngekoloyini. (2)
- 9.11 Amezwi kaZondani athi, 'Ngifa nje kungenca yakho' akulethela wuphi umqondo? (2)
- 9.12 Ingabe indlela yokuziphatha komlingisi onguKholiwe yokungavuleli indodakwakhe isifuba nanyana azi bona akasimlandu iyamukeleka kuwe na? Sekela ipendulwakho. (2)
- 9.13 Ngomutjho OWODWA akhe ucoce ngesithori senovela le. (1)
- 9.14 Ingabe igadango elathathwa ngubaba kaKholiwe lokobana athathe isiqunto sokuhloya umntwanakhe bekangasambhadeleli neyunivesithi kuligadango elihle nofana elimbi? Sekela ipendulwakho ngephuzu ELILODWA. (2)

[25]**IMITLOMELO YESIGABA B: 25**

ISIGABA C: UMDLALO

YELELA: ESIGABENI B kanye no-C, phendula umbuzo OWODWA omude kanye NOWODWA umbuzo omfitjhani.

Kilesisigaba kuneencwadi zemidlalo EZIMBILI, IBHUDANGO LAMI NOMBANGO KANZUNZA NOMANALA.

Khetha umdlalo OWODWA uphendule ngawo umbuzo OWODWA.

UMBUZO 10: UMBUZO OMUDE**IBHUDANGO LAMI – TG Mnguni**

Abatloli bemidlalo basebenzisa abadlali babenzise izehlakalo ezikholwekako nezingenziwa babantu abaphilako ukuphumelelisa lokho abakuhlosileko. Akhe utshwaye ngezenzo zabadlali uMbulawa noVenter nokukholweka kwazo emdlalweni wesihloko esithi, *Ibhudango Lami*. Indabakho ayibe magama ama-340–390.

[25]**NOFANA****UMBUZO 11: UMBUZO ONEMIBUZO EMIFITJHANI****IBHUDANGO LAMI – TG Mnguni**

Funda isiqetjhana esilandelako bese uphendula imibuzo.

(Kusekuseni ngesikhathi sokuthewukela eplasini kwaMathumbu)

ILUTJHA: *(Libuthene lodwa)*

MBULAWA: *(Ujame phambi kwalo)* Nithini-ke madoda izinto nazinje? Ngibuza ngombana nani niyabona bonyana abadala bathewukele.

ILUTJHA: Akubizwe induna kwamaswaphela sizwe bona yona ithini.

MBULAWA: *(Unqopha kuMbonani)* Ilutjha lisabawa ukukubona baba.

MBONANI: *(Unqopha elutjheni)* Sele ngifikile madoda.

ILUTJHA: Besibawa ukuzwa bona abadala bathini ngendaba yakwaMasuku? Sibuzwa ngombana sibona abanye babo sele baleyile ngomsebenzi.

MBONANI: Angazi mina madoda. Ihlokwami iyaduma.

MBULAWA: *(Ngommoya opholileko)* Sibawa bona usibizele bona sizwe bonyana bathini.

MBONANI: *(Uyababiza)* E ... bakwethu! Ngibawa bona nize nganeno noke! Khenizositjhukisa isikhumba nasi!

ABADALA: *(Bayifunde ivaliwe)* Lithomile ilutjha!

- MBONANI: (*Ujame hlangana nelutjha nabadala*)
Ngiyathokoza bakwethu! E ... ilutjha lithi libawa ukuzwa bona nithini ngendaba yokuqothwa komfelokazi kaMasuku?
- ABADALA: (*Ngommoya opholileko*) Sihlathululile bona nathi siphatheke kumbi ngendaba le. Besithi thina kungaba njani nange singabeka koke ezandleni zakaZimu, kube nguye obonako bonyana wenzani.
- MBULAWA: (*Ngehlonipho*) Ngamanye amazwi nitjho bona sisale sesifela ngaphakathi bobaba?
- ABADALA: Iye ndodana. Sizakuthini nje?
- ILUTJHA: Asikwazi ukufela ngaphakathi bobaba. Sele kusikhathi sokobana simfundise abantu uMathumbu!
- ILUTJHA: (*Ngokufuthumela*) Sithi akungathewukelwa!
- ABADALA: Kungathewukelwa? Bese senzani imini le yoke?
- MBULAWA: Thina besithi kungathewukelwa bese sikhuphukela kwaMasuku.
- ABADALA: (*Ngokufuthumela*) Siyokwenzani kwaMasuku? Angithi sele ibulungiwe indodana yakhona?
- MBULAWA: Sifuna bona kuyokuhlalwa bufukama khona. Phela lokho kuzomenza bona abone bonyana asikhambisani negadango lakhe.
- ILUTJHA: (*Ngokufuthumela*) Ngelethu lelo mkhozi!
- MBONANI: Niyalizwa-ke ilutjha bobaba? Alo-ke nithini nina?
- ABADALA: (*Basafuthumele*) Lizosiqotjhisa ilutjheli wena Mbonani! Alikhuphuke lodwa ukuya kwaMasuku!
- MBULAWA: Nithi niyakhumbula bona into evelele bakwaMasuku, izokuvelela nanyana ngubani oseplasinapha?

[Ikhasi 25–26]

- 11.1 Tlola isizathu esenza amapholisa agcine sele ayokusetjha elawini lakaMbulawa. (1)
- 11.2 Ngokurhunyezweko akhe utlole iqhinga elalisetjenziswa mapholisa wombuso webandlululo lokubulala amalunga wehlangano eyabe ivalwe umlomo nakabalekele eenarheni ezibomakhelana. Ipendulo ayibe liphuzu ELILODWA. (2)
- 11.3 Ngesikhathi umongameli weSikakarele abize umhlangano wamalunga wehlanganwakhe wathi kunejima ekufanele bathome ngalo. Ngiliphi ijima ebegade akhuluma ngalo? (1)

- 11.4 Tlola igama lendawo lapha kwabalekela khona uMbulawa lokha nakasuka eBotswana. (1)
- 11.5 Umongameli wehlangano yeSikakarele wathi ngikuphi okufanele kwenziwe balandeli behlanganwakhe ebalandelini behlangano eyabe ivalwe umlomo lokha nayilungiselela ukubanjwa kwamakhetho? Ipendulo ayibe maphuzu AMABILI. (4)
- 11.6 Ngomutjho OWODWA akhe urhunyenze ummongo-ndaba womdlalo lo. (1)
- 11.7 Ingabe isenzo somtloli sokusebenzisa amapholisa wabantu abanzima bona babehlangana newabantu abamhlophe lokha nakubulawa iimbotjhwa zombanganarha sisivezelani ngehlangothini leensebenzi ezibabantu abanzima zesikhathi sebandlululo? Ipendulo ayibe liphuzu ELILODWA. (2)
- 11.8 Ucabanga bona bewuyini umnqopho omkhulu kaVenter wokobana athi abona bonyana uTjhili sele akhubazekile kodwana aragele phambili nokumtjela bona akalethe umuntu ozomsebenzela iplasi? (2)
- 11.9 Ucabanga bona uyini umnqopho womtloli wokobana aveze umdlali onguMbulawa asisebenzi seplasini esibonakala sinebhudango esifuna ukulifeza? (2)
- 11.10 Phendula ngo**Liqiniso** namkha **Akusilo iqiniso** bese usekela isiqunto osithathako ngephuzu ELILODWA.
UTjhili ubekade angazi bona indodanakhe iwahloyile amakhuwa begodu ililunga lehlangano yezombanganarha eyabe ivalwe umlomo ephasini lekhethweli. (2)
- 11.11 Ingabe isenzo somtloli sokusivezela uMathumbu aragela phambili nokuqotha umndeni kamfelokazi kaMasuku ngemva kobana amalunga womndeni lo ahlongakalele eplasinapha unqophe ukufikisa umdlalo lo kiliphi izinga ngokwesakhiwo sawo? Sekela ipendulwakho ngephuzu ELILODWA. (2)
- 11.12 Ucabanga bona lokho okwenzekileko epilweni kaMbulawa kuyinto eyenzakala kwamambala? Sekela ipendulwakho ngephuzu ELILODWA. (2)
- 11.13 Ngokubona kwakho ingabe abadlali bomdlalo lo bayakhambisana nesizinda sendawo, sesikhathi nese pilo yabantu na? Sekela ipendulwakho ngezehlakalo EZINTATHU ezinembako. (3)

[25]**NOFANA**

UMBUZO 12: UMBUZO OMUDE**UMBANGO KANZUNZA NOMANALA – SM Mnguni**

Abatloli bemidlalo basebenzisa abadlali babenzise izehlakalo ezikholwekako nezingenziwa babantu abaphilako ukuphumelelisa lokho abakuhlosileko. Akhe utshwaye ngezenzo zabadlali uNzunza noManala nokukholweka kwazo emdlalweni wesihloko esithi, *Umbango KaNzunza NoManala*. Indabakho ayibe magama ama-340–390.

[25]**NOFANA****UMBUZO 13: UMBUZO ONEMIBUZO EMIFITJHANI****UMBANGO KANZUNZA NOMANALA – SM Mnguni**

Funda isiqetjhana esilandelako bese uphendula imibuzo.

(UTjhaba noMbangwa basale betjisa indaba abayibikelwe sigimi)

UTJHABA: Uyabona ukuthi sipheze sabanjwa, besiyokuhlawula ngani ekosini silila singakabetjhwa nje?

UMBANGWA: Ungasayiphatha leyo, ngizwe ngingenwa makhaza nangibona bangekosini bengaqala utjani lobu ukuthi kghani sebuyidlulisile indaba ebegade siphezu kwayo.

UTJHABA: Kungcono ngombana sengathi bebuvale iindlebe njengesifiso sami. Nakho-ke obusakukhuluma mngani sekuphandlusele kwethumba umabona ahlale.

UMBANGWA: Awa, seliphandlusele Mbangwa. Ngibona ukuthi liphandlusele msinya singakeqelwa maqaphazela.

UTJHABA: Kungcono ngombana wena ukhuluma ngamaqaphazela, mina ngikhuluma ngamathosi.

UMBANGWA: Amathosi abanzi.

UTJHABA: Kwamambala amathosi abanzi ngombana angeze wazi ukuthi ikulumo yethu ayikaweli eendlebeni zomuntu owararhwa yipera esifubeni.

UMBANGWA: Alo mngani sizokuhlangana embizweni nasihlukene lapha nje?

UTJHABA: Iye ndodekhetu sizakuhlangana endaweni.

UMBANGWA: Awa akube njalo mngani ukhambe kühle.
(Bahlukane)

(Kusesigodlweni sekosi uMusi KwaMnyamana, ikosi ihlezi neenduna zayo bayakhuluma)

(Ithi nayisikimako kudume uBayede)

IKOSI:	Sitjhaba sakababa nina bakaMafana.
IBANDLA:	Bayede! Ndabezitha!
IKOSI:	Namhlanje ngithabe kwekonyana ngokuthi ngifumane ithuba lokujama phambi kwenu. Bengingacabangi ukuthi ithuba elinjengaleli ngizakuba nalo. Kazi kurhwalele sitjhaba sakababa. Amehlo akasaboni kanti nomzimba uyangilandula. Ngithokoza iinduna nani noke eningisingathileko ngingasaboni emehlweni kodwana isitjhaba sakababa akhange singiqalele phasi namkha singifulathele. Nangilapha kini ngiqina idolo ngombana nofana ngingasithela angekhe isitjhaba sakababa sadosa emhlweni.
IBANDLA:	Bayede! Bayede! Ndabezitha!
IKOSI:	Ngithatha ithuba elinjengaleli ngilinkela abantu abasese namandla wobutjha. Akurhelelwa ukuthi ngizikatelele ngizizwa ukuthi sengiyabhalelwa. UManala nguye ozokuthatha unamrhali njengokwesiko.
IBANDLA:	Bayede! Bayede! Ndabezitha!
	Nginethemba lokuthi iinduna zizamsekela ngokubambisana nani sitjhaba sakababa. Kwanga ningabambisana njalo ngombana itjhatjha nesidlhayela asibeletwa lapha ekhetu. Angisakhulumi-ke ngetjhapha ngombana alikho.
IBANDLA:	Bayede! Bayede! Ndabezitha!
IKOSI:	Sengizakutjela iinduna ukuthi zithumele uManala azokuthatha unamrhali wakhe. Igama elizeleko ngizalinkela iinduna ukuthi zitjele uManala afike nini kimi. Ngiyathokoza sitjhaba sakababa niragele phambili ngokubambisana. (<i>Ikosi ihlale phasi</i>)
	[Ikhasi 7–9]

- 13.1 Ngokomdlalo lo kuthiwa ngaphambi kobana isitjhaba samaNdebele size la KwaMnyamana besihlala kiyiphi indawo? (1)
- 13.2 Tlola igama lakayise lekosi uMusi. (1)
- 13.3 Ngiziphi iinzathu EZIMBILI ezenze bona ikosi ikateleleke bona idlulisele unamrhali endodaneni yayo ezoyelama? (2)
- 13.4 Ngokurhunyeziweko tlola indaba abadlali abasetjenziswe esiqetjhaneni esingehlesi abathi bebaphezu kwayo nakuzakufika iinthunywa zangekosini. (2)
- 13.5 Ngiziphi iinzathu EZIMBILI ebezenza bona uTjhaba angamthembi uManala bona angakghona ukubusa isitjhaba naphezu kobana ayikutani kezobuzimba? (2)

- 13.6 Ngephuzu ELILODWA akhe urhunyenze ummango-ndaba womdlalo lo. (2)
- 13.7 Kubayini umdlalo lo ubizwe ngomdlalo-mlando. Ipendulo ayibe liphuzu ELILODWA. (2)
- 13.8 Ingabe isenzo sekosi uMusi sokudlulisela unamrhali kiloyo ozomelama ayedwa simveza amumuntu onjani? Sekela ipendulwakho ngawakho amagama. (2)
- 13.9 Phendula umbuzo ongenzasi ngo**Liqiniso** nofana **Akusilo Iqiniso** bese usekela isiqunto osithathako ngokuqalisa emdlalweni lo.
Isisusa serarano emdlalweni lo nguNanasi. (2)
- 13.10 Ekufikeni kwakaManala ekuseni athi uzokuthatha unamrhali sizwa ikosi ithi uNzunza sele amthethe ngobugajani. Ucabanga bona ikosi yalemuka njani bona nguNzunza oyigalajileko? (2)
- 13.11 Hlathulula indlela iintjhaba ezimbili ezikhulunyiswa emdlalweni lo ezacolelana ngayo. Ipendulo ayibe liphuzu ELILODWA. (2)
- 13.12 **Vumelana** nofana **uphikisane** nesitatimende esingenzasi bese usekela isiqunto osithathako ngokuqalisa emdlalweni lo.
Umtloli womdlalo lo usethulele uNzunza amdlali ohlakaniphileko nokwaziko ukulandela iyeleliso anikelwa zona. (2)
- 13.13 Abatloli bemidlalo esuselwa ehloko banokusebenzisa izehlakalo ezingakholekile ukwenzela bona imidlalo yabo ifinyelele emimango-ndabeni abayihlosileko. Ngokuyelela izehlakalo ezivela esethulweni somdlalo lo ungathi ngiziphi izehlakalo EZIMBILI ezifezwe mtloli ezingakholekileko? (2)
- 13.14 Ingabe uyazwelana nofana awuzwelani nomdlali onguManala ngokobana agalajwe ubukhosi bakhe? Sekela isiqunto osithathako ngephuzu ELILODWA. (1)

[25]

IMITLOMELO YESIGABA C: 25
INANI LOKE: 80